

沁源縣志

卷六

大事考

災異之說始於洪範盛於京房附會微茫在正史且多指摘况鄉國小誌而侈談星隕之文真無異癡人說夢矣然而睹赤雲之夾日疾疢興嗟詠白豕之涉波滂沱致異載籍所紀豈盡無稽况乎災荒匪亂其關係於民生者至深且切能由後以懲前庶有備而無患略災祥而重人事此物此志也作大事考

明

成化八年大旱民多餓死

正德八年八月天無雲而震旣而大風雨隨之平地水深丈餘漂沒民田千餘頃

嘉靖七年大火由東關南隅起延燒民房五百餘間文廟獨存

十三年大饑人相食是年流賊復掠縣境

十八年隕霜殺稼民饑

二十一年北兵殺掠人畜殆盡省憲題奏發金賑之

二十六年秋隕霜殺稼民饑至二十七年正月下沙蓬苗生民採食賴以不死

三十四年十二月地震至次年正月中方止官民衙舍多傾壞是年終民間訛傳選室女取紅鉛一時婚嫁殆盡

三十九年荒旱山賊楊甫聚衆作亂州守禦副千戶楊復楚死焉至四十一年撫院發標兵始平之

四十五年黑青見民晝夜擊金鼓持鐵刃逐之月餘乃止

隆慶元年北兵至郭道鎮而返是年石州陷

萬歷十四年大旱斗米百五十錢民多饑死逃亡上官發金賑之
十九年大水沁河漲溢淹沒民田數百頃

二十四年四月彗星見西北光芒燭天三尺許至七月始滅

二十六年六月初二日午刻日暈紅白綠色相間移時乃散七月
隕霜殺稼

二十七年正月至四月不雨無麥民饑至閏四月終方雨民始播
種米價騰貴斗米百錢撫按檄令開倉賑民仍發銀四百兩以
濟之

四十五年七月初七日飛蝗從東南來頭翅盡赤翳日蔽天知縣
杜汝懃步禱於八蜡廟旋有羣鴉食蝗禾稼不至甚損

崇禎四年十月十九日雨天寒甚樹木凝冰成刀鎗形

五年四月流寇入東關燒燬民房數百間村落殘破止留孤城數
百家次年歲荒斗米錢半千復遭瘟疫死者不可勝數

六年正月二十五日流寇大肆劫掠焚真武樓

十一年二月二十三日清明節天鼓晝鳴如礮聲是年先旱後風
民饑

十二年六月十一日大風雹拔木傷稼牛馬多死刮毀城樓三座
十五年六月初四日半夜地震由西北起移時乃止

末年山寇作亂攻縣西寨者數日守寨民張光盛等死於炮火以官民力守得不被寇寇尋受招安

清

順治八九十等年連被水災淹毀民田六百八十七頃有奇十四年奉旨蠲免糧銀

康熙三十年蝗入境知縣王容德率士民禱於州西嶺隨卽遠去三十四年四月初六日戌時地震人有壓死者

三十五年六年連被霜災米價騰貴民大饑多逃亡死者

五十一年雨雹如鷄卵琴山望之似雪

六十年晉省荒旱斗米半千奉旨命在京都察院今文華殿大學

士朱賡帑金五十萬賑濟汾平二府本縣舉人任官拔貢劉瑞
監生李任選生員鄭彥李杜董儒帷胡恂李其覺里民王廷珠
貢奇武揚威史爾訓史心佚任三聘武明英史繼唐等具呈撫
院藩司准予題請奉旨一併賑濟差刑部主事常賁銀三千兩
來沁散給饑民知縣高溥暨諸生下鄉分給又蒙蠲免本年錢
糧三千餘兩

雍正五年六月民間訛傳選取幼女嫁娶畧盡

六年四月初旬大疫傳染迅速鮮能免者

九年八月隕霜殺稼歲歉

十年夏大旱自正月至五月不雨閏五月初二日始雨先於三月

初旬微雨雪麥苗多被藥死雨後毀麥種穀秋大熟賴以不飢
乾隆五十八年春夏大旱自春至六月二十八日始得雨農民種
糜黍菽蕎麥菜根至秋大熟兆姓賴以全活

嘉慶二年饑十四年秋旱歲歉收十五年春旱斗米錢八百文五
六月得雨民始耕種粟價微減

十八年夏五月暴雨秋彗星見時教匪猖狂擾亂滑縣是秋禾熟
未刈忽大風禾盡偃

道光十年地大震閏四月二十三日天將夕地忽震動人幾顛仆
屋宇傾側居民恐惶移時始定

十一年十二月大雪

十五年自春徂夏旱二月趙城縣土匪曹順等作亂與沁邑鄰近
日夜戒嚴嗣賊匪四竄官兵跟剿過沁居民震恐六月十七日
雨民始耕種八月十六日嚴霜害稼民飢斗米價錢七百有零
二十二年六月初一日日食旣大星皆現

咸豐三年二月雨土是年粵匪肆逆延及晉省八月十五日數萬
髮賊由洪洞經過岳邑府城鎮沁邑之人於二十二日聞風逃
避居民舖戶爲之一空九月綿大人率兵過境賴以安堵是秋
幸獲收成十一月二十四日未刻地微震

七年秋七月星隕如雨二十日夜大小不一紛紛墜落其速如箭
其多如雨經兩時許

八年春彗星見色白形如劍光芒數丈數月始滅

十年正月初六日雨土夏大雨如注五月彗星見二十三日夜有星孛於北斗貫紫微垣至天市垣七日而滅

同治九年夏大雷雨

光緒三年春旱三月微雨民始布種夏復大旱五月初一日卯刻日赤秋大禋先是春夏稍旱二麥歉收六月雨苗稼頗全積粟之家冀秋收有望又斗價適昂紛紛出糶存粟殆盡不料七八月大旱禾不結實瓜菜亦皆槁死七里里書耆民具呈報災邑令廣公必親勘方准十月初一日州憲吳公親詣沁邑勘驗實已成災始詳報省憲嗣經邑紳等勸捐行戶本城先捐錢百十

餘千災重款微於事無濟迨十一月十九日各村人口冊籍到齊廣公定於十一月二十六日開倉放賑飭局紳連夜造冊議定大口每月給穀一斗小口減半十二月並四年正月又照前議加賑二次及至二月廣公因谷少人多恐難爲繼又稟請上憲祇散放極貧之戶且大小口俱限以五升人民爭懇無效遂以前議逕呈省憲至三月奉文仍按極次貧大口每月一斗小口減半之議散放共存活貧民大小四萬四千零六十二口統計五次共放賑穀一萬四千零四十四石有奇先是省憲因縣谷無幾又借蘇漕放賑由東陽關運縣散放惟路遠運艱不知何時到沁六月下旬札催領米廣公擇紳前往猶恐脚價無資

比遣紳赴關轉領則腳價俱國家給發七月初已運到二次當
起運時天雨連綿河水大發險阻泥淖運紳設法辦理不延日
期領運既竣尙長腳價銀三百二十兩有奇統計共領漕米一
千五百石雖數不甚多而活人已不可勝計矣廣公署縣係初
任蒞事未久性情拘執又多抱病每放賑時死口必除且飭局
紳嚴爲盤詰大約恪拘成例吝惜貲財中駟才也又因辦賑經
費無出飭紳勸捐並清查社款有侵吞舞弊者嚴予罰辦以示
懲戒惜邑不富饒捐罰二宗共錢一千六七百緡作爲辦荒善
後經費繼任穆公來始完全結束所有豁免錢糧數目詳見貢
賦門此辦理賑務之大概也因此次奇荒從前所無辦理賑濟

非常棘手約畧記之俾後之人知所備預耳

四年春大旱夏雹九月大雨初五至初九大雨晝夜不止十五六日始霽田禾盡壓米粒霉爛十一月內上憲又從東陽關撥來秬米三百石糴米三千零五十石什貼局撥來漕米七百五十石以備來春接濟貧民時代理印務者穆公經辦紳士爲王廷魁等

五年夏又有被雹數村除領給籽種外尙有贏餘存儲倉廩另冊報銷凡歷年監放穀米同城官員許公作霖姚公樂善李公樹滋自始至終日在倉廩尤爲出力九月善後局發給牛馬減價出售以濟民用沁邑牛十九隻馬六十七匹所得之價令作墾

荒經費連年領運漕米布袋改造寒衣散於貧民大祲後人烟稀少豺狼橫行縣官出示曉諭獲狼一隻賞錢四千前後共獲十隻各處屍骸暴露者鑿坑掩埋此項經費係捐罰兩項及東陽關運米餘脚均另冊報銷五年五月二十日天裂黃昏時由東北而西南又金星晝見

六年六月二十大雨雹十餘日任家庄等村禾稼皆傷

八年六月沁水大漲淹沒交口洪林官軍石渠孔家坡河西北園瓦窪庄琴泉溝有義村羅家庄韓洪溝閭寨南石等十四村民田數十餘頃

九年十月二十三日申時地震由北而南

十年大風拔木折損靈空山松樹一千餘株

十二年夏大旱麥苗半枯

十四年四月地大震屋瓦有聲

十六年鄂省饑民百餘逃荒過境至北鄉乘機搶劫大峪村馬永威家古寨村孫久盛家均被其害後至竇壁將搶武廷相時武爲本村公正齊集村衆禦之始鼠竄去

六月大雨沁河大漲兩岸土地湮沒殆盡

十七年六月十一日未時大雨雹大者如鷄卵小者如彈丸麥苗盡傷禾秋半折毀種莠蕎亦未成熟

十八年秋雨連綿河水溢漲教場楊蘆灘宋家灣田家泉陰家灣

等地完全爲沁河淹沒

二十二年夏大雨沁河溢塌東北鄉陽城村下柳村洪林村交口村張壁村曹家園牧花園南石北石沿河一帶民田三十餘頃冬十月牛瘟沿南北幹路二十餘村爲烈至翌年二月止

二十四年詔科考取士改爲策論經義書院改爲學堂尋復書院舊名

二十六年大旱自春至夏無雨六月二日始雨米價每斗制錢八二百文 王和一千二百文

太白經天

義和團起謠傳得異人傳授能禦鎗彈城關無賴子弟及馬森村

村民習焉當時在沁傳教者早遁本縣幸無入教人民未釀禍端祇驅逐流丐以逞其威二三區亦然

二十七年知縣李兆勉誘擒大刀會匪首吳希魁王學海誅之

按沁源之東南鄉僑居者多山東客民吳希魁王學海本山東籍趁拳匪之亂嘯聚黨徒百餘名曰大刀會後強取米粟肆行騷擾而於教民爲尤甚經樊清正告發撫院札飭李令嚴行拿辦時會雖經解散而勢尙未衰李令不動聲色邀吳王至署當堂擒之梟首示衆餘黨始鼠竄

春早夏六月大雨雹

二十八年夏旱麥歉收秋八月隕霜禾稼盡殺